

Jangan ambil serius tindakan Muhyiddin, kata ahli MT Umno
The Malaysian Insider
July 27, 2015

Datuk Seri Reezal Merican Naina Merican menyarankan agar rakyat tidak terlalu cepat menganggap teguran Timbalan Perdana Menteri Tan Sri Muhyiddin Yassin semalam sebagai isyarat akan berlakunya masalah dalaman parti.

Ahli Majlis Tertinggi Umno itu dalam kenyataan medianya hari ini mengingatkan supaya mengambil pandangan yang disuarakan Muhyiddin itu sebagai nasihat, demi kelangsungan parti.

"Saya benar-benar mengharapkan, agar kita tidak terlalu cepat mengangkat 'teguran dan pandangan' Muhyiddin ini sebagai mesej untuk berlakunya masalah dalaman di peringkat parti.

"Saya juga mengharapkan agar kita dapat menyantuni teguran Muhyiddin ini dengan komitmen dan tekad baru untuk memperteguh semula kepercayaan rakyat," kata Reezal.

"Saya ingin menzahirkan rasa kesal kerana ada portal dan platform media baru yang sudah memberikan label dan gelaran kurang sesuai kepada pandangan Muhyiddin ini. Pada saya, ini tidak wajar berlaku."

Muhyiddin semalam berkata kekeliruan mengenai skandal 1Malaysia Development Berhad (1MDB) semakin rumit sehingga menyebabkan kerajaan masih gagal menerangkan situasi sebenar kepada rakyat.

"Mungkin apa yang dicadangkan oleh Muhyiddin itu boleh dijadikan sebagai asas awal untuk menyelesaikan isu kekurangan maklumat ini. Kita tidak boleh ada jurang masa yang terlalu lama dalam mengisi pengharapan dan keinginan rakyat," katanya.

Reezal yang ahli Parlimen Kepala Batas itu turut memuji isu 1MDB sedang ditangani dengan baik dan telus oleh kerajaan.

"Siasatan sedang berlaku, malahan beberapa individu sudah pun ditahan untuk membantu siasatan," katanya.

Katanya, dengan siasatan dan keberanian pasukan petugas khas dan pihak berkuasa lain wajar diteruskan tanpa sebarang gangguan sambil memuji keberanian kerajaan untuk membuka dapatan kajian laporan interim tersebut.

"Laporan interim tidak bersifat konklusif. Maka dengan itu ianya masih terbuka untuk dianalisa dengan sekomprensif mungkin apabila siasatan lain sudah lengkap nanti," katanya. – 27 Julai, 2015.

Source:

<http://www.themalaysianinsider.com/bahasa/article/jangan-ambil-serius-tindakan-muhyiddin-kata-ahli-majlis-tertinggi>